

## ■ SAMEDAN

Eroport ha reduci  
uras da manaschi

(rtr) Pervi da la situaziun speziala en connex cun il coronavirus e la situaziun economica tendida, han ils sgols prendi giu marcantamain. Perquai ha l'eroport regional da Samedan era reduci sias uras da manaschi. Tenor comunicaziun saja quai capità en cunvegientscha cun l'Uffizi federal per aviatica civila BAZL. Sgols da salvament e per la segirezza publica sajan dentant er garantids en l'avgnir. Davent dals 21 da mars valan ad interim per l'eroport da Samedan temp da sgol: 9.00–12.00 e 14.00–17.00.

## ■ VALCHIAVENNA

Valchiavenna  
cloma per agid

(rtr) Ils burgamesters da pliras regiuns talianas al cunfin cun il Grischun suppligeschan la regenza grischuna ed en spezial las regiuns Engiadina, Bregaglia, Moesa ed il Puschlav da serrar tut ils plazzals betg essenzials per uschia impedir ch'il virus sa derasia anc pli fitg. Da far ussa in tal stop da plazzals muntia er da betg perder la stagiun da stad, scrivan las burgamestras ed ils burgamesters. Cun la quarantina possia vegnir impedì ch'il virus sa derasia. Questa mesira na perturgia betg ils cunfinaris che lavurian en il sistem da sanadà e per interpresas che produceschian rauba dal basegn fundamental. Vitiers suppligeschan ils presidents communalis er las autoritads grischunas perturgadas da spustar l'avertura stagiunala dals plazzals.

## ■ VALLADAS TALIANAS

Ils plazzals restan  
vinavant averts

(rtr) Er sch'il Tessin ha decidì in scumond general per tuttas firmas da construcziun da lavurar, resta la regenza grischuna tar sia decisiun che tals scumonds po sulet la Confederaziun decider. En las valladas talianas restan uschia ils plazzals avert, malgrà la critica.

Ils represchentants da la regiun Moesa pretendan da la regenza grischuna daplì sustegn. La regiun Moesa saja en ina sumeglianta situaziun sco il Tessin e dovria perquai era mesiras sumegliantas sco il Tessin. Ils cussegliers guvernativs *Marcus Caduffe* e *Peter Peyer* han chapientscha per ils quitads ed ils pensiers da la regiun. I saja ina situaziun speziala, tuttina saja dentant da suandar las prescripziuns da la Confederaziun.

14 deputadas, deputads e presidents communalis da la regiun Moesa èn sa scuntrads a San Bernardin cun ils cussegliers guvernativs Peyer e Caduff sco er cun il schef dal stab directiv chantunal *Martin Bühler* per in barat cuminaivel. Ils represchentants dal chantun han suttastritgà l'impurtanza d'ina gestiun centrala da las mesiras cunter il coronavirus tras la Confederaziun. Quella aveva declerà cler e net che mesiras chantunales che cuntrafetschian a las disposiziuns valaivlas da la Confederaziun, na sajan betg pussaivlas. La delegaziun è perquai sa rendà mardi a Puntraschigna, nua ch'ella è s'inscuntrada cun represchentants e represchentants da l'Engiadina e da las autras vals dal sid.

A la fin da la scuntrada han las represchentants ed ils represchentants da la Moesa suttastritgà lur confidenza en la regenza e las numerusas posiziuns cuminaivlas. Ins spetgia ussa ch'il Cussegl federal anticipeschia la situaziun futura e na reageschia betg cun retard.

En memoria d'in meriteivel magistrat:  
cusseglier guvernativ Bernardo Lardi

DA DUMENI COLUMBERG \*

■ **La gievgia vargada ei gl'antieru cusseglier guvernativ, dr. iur. Bernardo Lardi, spartius nunspetgadamein ella vegliadetgna da mo 83 onns. Il coronavirus ha pretendiu ina prominenta unfrenda en nies Cantun.** In crudeivel destin per sia famiglia e per nosa cuminonza entira! Il trapassau ha apparteniu naven dall'entschatta december 1979 entochen la fin da 1986 alla regenza grischuna e tgamunau suveranamein il departament da giustia e polizia. Silsunter ha el cuntinuau sia activitad professunala sco versau e respectau advocat, mo era sco tschercau cussegliader en differentas funcziuns e missiuns, e quei entochen avon entginas jamnas.

Ina buna scolaziun e l'entschatta  
professunala e politica

Bernardo Lardi ei naschiu 1936 a Le Prese (Poschiavo) sco frar schumellin da dr. Massimo Lardi (il posteriuir vicedirettur dil Seminari scolastic dil Grischun). En in bien ambient famigliar eis el carschius si. Sunter las scolas popularas frequentava el il gimnasi claustral a Mustér (1951–1954) e fa la matura ad Altdorf/UR. Lu suonda il studi dalla giurisprudenza all'Universitad da Turitg ch'el concluda 1969 cun il doctorat. Plinavon acquista el la patenta d'avocat e notar. Igl onn 1965 vegn el engaschau sco inquisitur public per las vals talianas cun sedia a Samedan e Cuera.

1969 sedecida Bernardo Lardi d'arver in'atgna canzlia d'avocatura a Poschiavo cun ina filiala a Samedan. El ei in giurist tschercau cun bunas relaziuns cun il mund finanziar ed economic. Malgrad quei engaschi cumplein surpren Lardi 1970 igl uffeci da podestà dalla vasta vischnaunca da Poschiavo (successur dil legendar Felice Luminati). Cunquei ch'el ei surcargau cun lavur, desista el suenter quater onns dil presidi communal e secuntenta cul post da vicepodestà. Duront otg onns representa el la vallada poschiavina el Cussegl grond. Duront quei temps hai jeu empriu d'enconuscher ed apprezzar Bernardo sco ina personalitad amicabile e concilianta, plein bunaveglia e survetscheivladad. Deputau Lardi era in excellent ambassadar dall'Italianità e dallas regiuns perifericas.

## In Poschiavin simpatic ed equilibrau

Ils onns 1978/79 ha ei dau enormas turbulenzas sil palancau politic el Grischun, colligjadas cun demissiuns nunprevedidas ella regenza ed el Cussegl dils stans. Ina vehementa campagna mediala e hostilitads persunalas pervia da piculezzas da tempra formala (fallida titulaziun ed

in'indemnisaziun dubiusa) han caschunau quei tiaratriembel. Aschia ha la Partida cristiandemocratica giu da nominar enteifer cuort interval treis candidats, numnadamein per la regenza (enstagl da Reto Sciuchetti), per il Cussegl dils stans (en pei da Gion Clau Vincenz) e cuort sissu per il Cussegl naziunal (en pei da Luregn Mathias Cavetty). En quella situaziun fatala ei la PCD stada leda ed engrazieivla d'anflar in candidat capavel e qualificau, e nominau ils 23 da zercladur 1979 cun gronda maioritad Lardi sco candidat uffical per la regenza. Sunter in viv cumbat electoral cun treis aspirants eis el vegnius eligius il 9 da settember 1979 gia egl'empren scrutini honorificamein cun varga 15 000 vuschs, il dubel da siu cuntercandidat socialdemocrat Arno Liesch e dil candidat selvadi Edwin Decurtins. Cun quella elecziun memorabla ein las vals talianas puspei stadas rappresentadas ella regenza. Il di dall'elecziun ei ina gronda fuola serimmada silla piazza a Poschiavo ed ils zenns-baselgias han tuccau per commemorar quei eveniment particular.

Sper sias qualitads indiscutablas e sia reha experientscha politica ei sia elecziun era stada ina reverenza visavi la minoritad taliana e las valladas dil sid ch'èran dapi dus decennis buca stadas rappresentadas pli ella regenza (sunter il nunemblideivel onorevole dottore Ettore Tenchio). (Entginas jamnas pli tard sun jeu vegnius eligius el Cussegl naziunal, ensemen cun Toni Cantieni, Martin Bundi, Ulrich Gadiet e Christian Jost).

## In magistrat respectau e cumpetent

Lardi surpren il departament da polizia e giustia, in dicasteri predestinau per il valent e cumprovau giurist. El ei in cau beinvulent ed apprezzau e tgamuna siu uffeci cun grond engaschi, cun senn da responsabladad e capientscha per ils bassegns dil pievel e dil Cantun. Cun siu esser natiral ed equilibrau sco era sia forza da perschader rabetscha el sut tetg in tschuppel impurtontas fatschentas sco revisiuns da leschas ed ordinaziuns. Menziun speciala mereta la biala ovra dil tunnel dil Vereina ch'ei daventada in benefici per ina gronda part da nies Cantun. All'entschatta ha il niev cusseglier guvernativ aunc giu da s'occupar cun la transversala alpina dil Spligia, in vegl desiderì dil Grischun che ha la finala fatg naufragi sin palancau naziunal. El ha era dau impuls decisivs per ina nova politica turistica ed apparteniu all'organisaziun turistica aschibein cantunala sco naziunala, mo era alla giunta dalla Viafier retica.

Malgrad quei fritgeivel operar eis ei vegniu instradau gl'atun 1985 ina malvuglida campagna mediala cun supposi-



Igl antieru cusseglier guvernativ Bernardo Lardi (PCD) ei morts la gievgia vargada en consequenza d'ina infecziun cul coronavirus. MAD

vart irregularitads che duessen esser succedidas en sia funcziun d'avocat avon l'appartenenza alla regenza. Quellas attaccas massivas han tuccau il magistrat aschi ferm ch'el annunzia l'en-tschatta december 1985 da desister d'ina reelecziun. Las supposiziuns ein dil reminent mai vegnidas cumprovadas e scochemai sia renunzia ei stada enconuscha, ha negin pli plidau da quei cass. Per Lardi ei quei stau ina greva frida persunala, el ch'ei adina sestentaus per dretg e fei. Talas malgiustias capetan adina puspei el mund politic.

Ina nova e fritgeivla  
activitad zun varionta

Sunter l'activitad guvernamentala sededichescha Bernardo alla pictura ed al manteniment d'objects historics. El repren era sia activitad professunala ed arva danovamein ina canzlia da giurisprudenza a Cuera cun in tschuppel collaboraturas e collaboratur, oz sut l'egida da siu fegl Mauro. Entochen avon entginas jamnas serendeva el regularme in biro per s'infomar sur da quei che succedeva e per consultaziuns da tempra speciala. El ha era giu entgins impurtonts mandats sco p. ex. commember dil cusseggl d'administraziun dalla Viafier federala, il Fondo da lottaria intercantunale e dalla CORSI. Merets restonts ha Lardi per

l'italianità, e quei sin zun differentes secturs. Quella fri-tgeivla activitad ei era vegnida renconuschida dalla Pro Grigioni cun la commembranza d'honor.

Sunter l'elecziun ella regenza ei Bernardo Lardi secasaus cun sia famiglia a Cuera, mo manteniun stretgs ligioms cun «sia val poschiavina». Sia premurada ed attaschada consorta Angela Lazzarini e ses quater affons ein stai per el in scazi fetg prezios. Tonpli greva ei il cumiau anetg dil bien bab per la consorta e l'entira cuminonza. Quella vegn aunc pli greva, damai che l'epidemia impedescha in cumiau en fuorma cristiana ed usitada.

Bernardo Lardi ei staus ina persunalitad profilada ed equilibrada cun respect dallas valurs humanas e cristianas. El ei buca staus la persuna dalla inscenzaziun, mobein dalla lavur seriusa e fundada cun in tun moderau, denton perschudent e verdeivel. Ina veta entira eis el staus attaschaut al patrimoni poschiavin ed alla viarva e cultura dallas vals talianas. El resta a nus en buna e nunemblideivla memoria sco ina personalitad honesta e mudesta, plein engaschament e bunaveglia per il concarstgaun e nosa entira communitad.

\* Dumeni Columberg ei staus deputau (1979–1983) e cusseglier naziunal (1979–1999).



Bernardo Lardi sco cusseglier guvernativ 1979–1986. ARCHIV SOMEDIA



Sessiun dil Cussegl grond culs cussegliers guvernativs da sen.: Bernardo Lardi, Reto Mengiardi, Donat Cadruvi, Christoffel Brändli ed Otto Largiadèr. Davostier da sen. Ida Derungs (vicepresidenta dil Cussegl grond), Luzi Bärtsch (president) e Fidel Caviezel (cancelier cantunale). ARCHIV SOMEDIA